



DETG DENTER NUS

MAGAZIN UFFICIAL DALLA VISCHNAUNCA DA DISENTIS/MUSTÉR



Quen 2021 e plan da finanzas	4/5
Project hotel Acla da Fontauna	8
Sanaziun ed engrondaziun Center Fontauna	9
Ludoteca Mustér e contuorn	10/11
Nossas uniuns: Uniun da costumes Mustér	13
Avon onns	14/15

Kurz und bündig – Detg denter nus



Die Juniausgabe des «Detg denter nus» bietet der Leserin und dem Leser eine Menge Informationen, unter anderem über die Jubiläumsfeier der Bergbahnen Disentis (Bild auf der 1. Seite). Der Präsident und die Vizepräsidentin des Gemeinderats, Adrian Deflorin und Helga Probst, gehen auf die aktuelle Entwicklung in der Gemeinde und der Region ein. Der Gemeindepräsident René Epp erläutert die Gemeinderechnung 2021 und gibt Einblick in die Finanzplanung 2022–2031. Mit einer Selbstfinanzierung von rund 2,6 Millionen Franken und Nettoinvestitionen von fast 1,2 Millionen Franken kann der Gemeindevorstand ein gutes Ergebnis präsentieren. Bei der Finanzplanung sind hohe Investitionen vorgesehen. Der Gemeindevorstand wird für ein gutes Gleichgewicht zwischen einer progressiven Entwicklung der Gemeinde und den Gemeindefinanzen besorgt sein.

Am 22. April 2022 orientierten die Gemeindebehörden und die Vertreter des Hotel Acla da Fontauna über das weitere Vorgehen betreffend Hotelprojekt und Sanierung und Erweiterung des Center Fontauna. Wenige Tage danach wurden die Bauarbeiten im Center Fontauna gestartet.

Die zweite Ausgabe des «Detg denter nus» im Jahr 2022 gibt den Verantwortlichen der Ludothek Disentis die Möglichkeit, sich vorzustellen. Ebenfalls erhalten die Leserinnen und Leser Einblick in das Vereinsleben der Uniun da costumes Mustér. Im Interview gibt der Oberstufenlehrer Christoph Berger interessante Informationen über seine Tätigkeit.

Zu guter Letzt erinnern wir uns an das Jahr 1689. Genau vor 333 Jahren wurde Disentis von einem gewaltigen Felssturz heimgesucht: Die Bova gronda.

Temps d'avertura dall'administraziun communal

Valeivel per tuts uffecis en casa communal

Spurtegl

Gliendisdis	08.30 – 11.30	15.00 – 18.30
Mardis–gievgia	serrau	15.00 – 17.30
Venderdis	07.30 – 14.00	serrau

Telefon

Gliendisdis–gievgia	08.00 – 12.00	13.30 – 17.00
Venderdis	07.30 – 14.00	serrau

Igl access en casa communal e l'investa els documents exponi publicamein ein pusseivels durant las uras d'avertura dil spurtegl.

Ulteriur sclariment durant las uras da telefon
081 920 36 36.

Impressum

Editor

Vischnaunca Disentis/Mustér
Via Cons 2, Caum postal 57
7180 Disentis/Mustér
detgdenternus@disentis.ch

Redacziun

René Epp, Hans Huonder (coordinaziun)

Fotografias

Hans Huonder, vischnaunca da Mustér,
Ludoteca Mustér e contuorn e mess a
disposiziun

Edizium

1100 exemplars
Cumpara mintga quartal

Layout e grafica

luna:mediadesign GmbH,
Via Principala 36, 7166 Trun

Stampat

Stamparia La Tuatschina,
Via Alpsu 62, 7188 Sedrun

«Curaschus egl avegnir»

Il temps actual ei fetg interessants per Mustér. Nossa vischnaunca sesanfla momentan puspei en ina fasa da grond svilup e transformaziun. Plirs investurs realise-schan gronds projects turistics. Per la vischnaunca ei il temps da manteniment, renovaziun e sanaziun arrivaus. Ed il temps da pensiun dils «Babyboomers» stat medemamein avon esch.

Per bein enqual impressari da Mustér munta la cun-tinuaziun da sia fatschenta e cun quella ils plazs da lavur da bein enqualin da nus, ina gronda sfida. Entgins han il cletg da saver surdar la bitgetta alla proxima generaziun dils confamiliars. Bein enqual sorprendider giuven lavura gia ella fatschenta da ses geniturs, auters han la curascha da fundar sez ina. Tals giuvens han giu ina scolaziun eccellente, ein inno-vativs e fetg motivai. La midada dil tgamun drova dils giuvens impressaris sco era dils geniturs bia curascha. Il pass segirescha denton pil futur ils plazs da lavur ella regiun e porta a liunga vesta la pusseivladad da frequentar in emprendissadi el vitg nativ.

«Mustér ha in grond scazi da cultura e sport.»

Sin iniziativa privata ei momentan bein enqual project sin rucca, seigi quei la punt pendenta a S. Gada ni la stizunetta a Mumpé Medel, il Lag Salischinas a Sumvitg ni la marcanta engrondaziun dils locals da fatschenta dalla mazlaria a Curaglia, per numnar cheu mo entgins. Ideas ein biaras en nos tgaus. Ellas ein indispensablas pigl avegnir dalla vischnaunca, dallas fatschentas indigenas, per nies turissem ed aschia era per mintgin da nus. Iniziar e realisar talas drova denton curascha, in fetg grond engaschi dils iniziants sco era bia daners. Deplorablamein ein il daners necessaris il bia il crap da scarpetsch dalla realisaziun, san ils iniziants buca adina organiser tals sez. Mo ei dat ina soluziun. Sche las ideas e projects portan al vitg ni alla regiun ina plivalur segidan las instanzas cantunalas vid la finanziaziun. La via per obtener talas subvenziuns ei meinsvart stentusa e pretensiusa. Nies sviluppader regional segida denton bugen per passar communablamein e cun success quella via e la fin finala da realisar ils projects previ.

En nossa vischnaunca existan rodund 60 uniuns ed organisaziuns. In scazi cultural e sportiv nundetg. Era las uniuns ed organisaziuns sbattan cuagl avegnir, cun lur survivor. Entginas pli pauc, entginas pli fetg. Muort la sminuaziun da naschientschas e la depopulaziun



*Adrian Deflorin,
president dil cussegl
da vischnaunca 2022*



*Helga Probst,
vicepresidenta
dil cussegl da
vischnaunca 2022*

han las uniuns ed organisaziuns breigias d'anflar novas commembras e commembers. Cunzun occu-par ils uffecis da suprastonza daventa pli e pli grev. La consequenza ei che las purschidas vegnan smi-nuidas, resp. las uniuns vegnan sliagidas ni ch'adina ils medems prendan la fin finala las hottas enta maun e s'engaschan. Per levgiar il buordi da tals drova ei era cheu curascha. Curascha da patertgar el futur vid novas fuormas sco p.ex. collaboraziuns pli stretgas ni schizun fusiuns. In fatg che drova bia sentiment e beinvuglientscha da tuts involvi, che segirescha denton igl avegnir. Perquei seigies curaschus. Mo cun curascha savein nus formar nies futur.

*Adrian Deflorin,
president dil cussegl da vischnaunca 2022*

*Helga Probst,
vicepresidenta dil cussegl da vischnaunca 2022*

Quen annual 2021 – il pli impurtont

Il quen annual dalla vischnaunca pigl onn 2021 ei buns. El se presenta legrevlamein sur la media dils davos tschun onns. En cumparegliazion cul preventiv 2021 havein nus in avanzament ordvart positiv, quei ch'ei en mintga cass da beneventar. Il preventiv 2022 vegn, auter ch'ils davos onns, calculaus pli datier alla realitad ed allas cefras effectivas, aschia ch'il quen final 2022 vegn igl onn proxim segiramein a s'avischinar pli datier al preventiv. Quella nova metoda da calculaziun ei buca pli aschi restrictiva, ei lu perencunter cumbinata cun in pli pign spazi da reserva per eventualas expensas nunprevidas.

Medemamein se presenta era il quen d'investiziun. Il preventiv haveva previu investiziuns nettas ella summa totala da varga sis milliuns francs. Effectivamein havein nus investau netto strusch 1,2 milliuns francs. D'in maun ha quei da far cun grondas investiziuns ch'ins ha aunc buca entschiet (p.ex. Center Fontauna), da l'auter maun culla munconza da resursas personalas per saver realisar tut las investiziuns previdas. Il futur vegn la suprastonza communal ad haver aunc in'egliada pli critica sil quen d'investiziun ed emprova era cheu, sin fundament dils novs principis dil plan da finanzas, da calcular taluisa, che las resursas ch'ei a disposiziun veggan nezegiadas aschi optimalmein ed effectivamein sco pusseivel. Cun far las investiziuns necessarias garantin nus in bien e progressiv svilup en nossa vischnaunca. Quei pretenda ina sauna planisaziun dallas finanzas e dallas resursas personalas.

Cun in'atgna finanziaziun da varga 2,6 milliuns francs ei il quen legrevlamein fetg positiv. Quell'impurtonta cefra da clav stuess denton aunc esser pli aulta il futur. Leu cunzun schai la gronda sfida dalla vischnaunca da Mustér. La suprastonza communal se sprava cun tutta forza e cun grond'attenziun da sviluppar vinavon la vischnaunca, aschia ch'ella vegn da saver augmentar il futur consequentamein las entradas annualas. L'atgna finanziaziun duei crescher vinavon. Culla reducziun dil pei da taglia per 10% vegn la vischnaunca en in emprem pass denton a stuer mirar co il quen annual sesviluppescha cun meins entradas da rodund 350'000 francs.

Il bien resultat dil quen 2021 dat la pusseivladad da far in ulteriur deposit dad 1,2 milliuns francs ella prefinanziaziun dil project innovativ Center Fontauna. Quei ei per la vischnaunca da Mustér in grond avantatg. Plinavon vegn amortisau cum-

pleinamein las vias cantunalas surpridas dil model da quen vegl. Quella prefinanziaziun sco era las amortisaziuns supplementaras veggan ad esser in levgiament pils ulteriurs quens annuals.

Cul niev plan da finanzas ed ils novs principis d'elavurar il preventiv vegn la suprastonza communal a saver dar in bien equilibr denter segirar in saun tenercasa dallas finanzas e tuttina far las investiziuns necessarias per garantir il futur il svilup progressiv ed augmentar l'attractivitad en nossa vischnaunca.

La suprastonza communal selegra d'astgar presenttar uonn in bien quen.

Cheu ina grafica davart las pli impurtontas cefras da clav dils davos 10 onns (2012–2021):




Ils davos 10 onns ha l'atgna finanziaziun (cash-flow) pli u meins adina saviu cuvierer las investiziuns nettas. La finamira a lunga vesta ei da saver purtar il pli dallas investiziuns ord atgna forza finanziaria. Il grad dall'atgna finanziaziun en % muossa tgei cumpart dallas investiziuns nettas che ha saviu vengnir cuvretga ils davos onns cun agens mieds finanziarials. Cun 100% cuviera il cash-flow 100% dallas investiziuns. Sch'il grad dall'atgna finanziaziun ei sut 100% sto la vischnaunca prender si capital jester per saver realisar tut las investiziuns necessarias. Las cefras presentadas dils davos 10 onns muossan in bien svilup dallas finanzas.

Plan da finanzas – il pli impurtont


Il plan da finanzas ei in impurtont instrument da planisaziun. Sin fundament dallas aultas investiziuns che spetgan la vischnaunca da Mustér ils proxims onns ha la suprastonza communal analisau da rudien las finanzas futuras e mess sin via ina nova planisaziun da finanzas. Quella ei dependenta dils resultats effectivs annuals. Quei agir garantescha a nus era pils proxims 10 onns ina planisaziun da finanzas sauna, senza denton stuer desister sillas investiziuns necessarias. In bien equilibr financial ei da grond'impurtonza pil svilup progressiv da nosssa vischnaunca.

Cheu il svilup dallas finanzas pils proxims 10 onns (2022–2031):




Il proxims 10 onns vesa il maletg financial ora empau auter ch'ils davos 10 onns. Aschia vegn l'atgna finanziaziun (cash-flow) buca a saver cuvierer tuttas investiziuns nettas previdas (denter auter la grond'investiziun el Center Fontauna). Il grad dall'atgna finanziaziun en % demuossa fetg bein quei. Cunzun ils emprems onns dalla planisaziun da finanzas ei il grad dall'atgna finanziaziun sut 100%. Aschia sto la vischnaunca prender si capital jester per saver realisar tuttas investiziuns previdas. Ils deivets per la vischnaunca vegnan a crescer sin varga 20 miliuns francs.

Mira grafica sisum dretg.



Tonaton restan ils deivets netto per habitont, quei ch'ei ina dallas pli impurtontas cefras da clav, en in rom supportabel. Suandonta grafica demuossa quei fetg bein:



Supportabels ei il deivet net per habitont sch'el survarga buca 5000 francs. Il proxims onns vegnin nus a contonscher quella limita, persequitein ed analisein denton detagliadamein e rigurusamein ils resultats dils quens futurs, ils quals han grond'influenza silla planisaziun da finanzas.

La suprastonza communal ei perschuidida ch'il plan da finanzas garantescha in bien svilup progressiv en nosssa vischnaunca ed ina sauna planisaziun da finanzas.

René Epp, president communal

Promover il moviment



Gia cuort suenter l'installaziun dil pumtrack sil plaz avon la halla Cons eis ei vegniu fatg diever da quel.

Surpeisa ei buca mo in problem da biars carschi, mobein era d'affons e giuvenils. Cun in program davart la promoziun dalla sanadad tier affons e giuvenils emprova il igl Uffeci da sanadad dil cantun Grischun da dar cunterpeisa a quella tendenza. Quei succeda denter auter cun in pumtrack e quel ei staus piazzaus duront in temps sin plaz scola a Mustér.

Il davos monitoring da BMI (Body-Mass-Index) muossa ch'adina dapli affons e giuvenils han da sbatter cun surpeisa. Ils motivs persuenter ein differents. Quei sa esser in falliu nutriment, munconza da moviment ni squetsch psychic. Cul program davart la promoziun dalla sanadad tiels affons e giuvenils vul il cantun Grischun cumbatter quei fenomen. Quei vul el far cun rinforzar las resursas e promover l'infrastructura en favur dalla sanadad ellas vischnauncas.

Sauns e ventireivels

La finamira dil cantun ei da procurar ch'affons e giuvenils el Grischun seigien sauns e ventireivels. Sch'els san tgei fuormas da moviment che fan plascher ad

els, semuenter els era. Sche quei reussescha, sesbassan era ils cuosts en favur dalla sanadad. La participaziun alla veta sociala, sentupadas cun amitgs e loghens nua che affons e giuvenils san setener si ein facturs ch'ein buca da sutschazegiar en quei connex. Loghens cun caschuns da semuenter e da s'entupar han pia in'impurtonta funcziun. Il pumtrack ch'il cantun metta a disposiziun allas vischnauncas per in temps limitau porscha la pusseivladad d'examinar in indrez ch'ademplescha quella funcziun. El ei adattaus ton per in'actividad el temps liber sco per l'instrucziun da sport el liber e quei era gia pils pli pigns. Il pumtrack ei ina pista per bunamein tut cun rodas. El consista d'undas e carrauns. Las undas vegnan nezegiadas per survegnir tempo. Las differentas pusseivladads da cumbinaziun porschan sport e divertiment per tuttas gruppas da vegliadetgna. Al pumtrack ei montau in'apparatura che dumbra las rundas. Aschia ha la vischnaunca la pusseivladad d'examinar il diever da quell'infrastructura. Sper in vehichel cun rodas ei ina capellina necessaria.

continuaziun pagina 7

Cuntinuaziun dil project «La participaziun d'affons e giuvenils en nossa vischnaunca – Jugendfreundliche Bergdörfer»

Suenter haver fatg ils emprems pass dil project «analisa dalla situaziun en vischnaunca, luvratōris en scola, evaluaziun dils dis da lavur» vegn la Cumiessiun da giuventetgna Cadi ella fasa finala dil project. La retschercha en nossas scolas ha mussau che nos affons e giuvenils han giavischs e visiuns per migliurar la purschida per affons e giuvenils en nossas vischnauncas. Ed els fussen interessai da s'engaschar sez per realisar in u l'auter project. Quei reussescha denton mo sche tuts – affons e carschi – s'entaupan, sediscuoran e segidan. Ils affons ston era vegnir integrat en process politics, els ston denton era far persenn che buc tut sa vegnir realisau, era per motivs da cuosts.

En in «workshop» han ils commembers dalla Cumiessiun da giuventetgna Cadi elaborau ensemen culla menadra dil project Flurina Spreiter in carnet da propostas che las vischnauncas da Mustér, Tujetsch, Medel, Sumvitg e Trun san realisar a cuorta, mesa ed a liunga vosta. Quellas propostas cuntengan denter auter las ideas co integrar la

giuventetgna en cumiessiuns enteifer la vischnaunca, francar la lavur da giuventetgna meglier els pensums d'ina vischnaunca, scaffir ina sessiun da giuventetgna, visetas dallas autoritads communalas en scola e quei regularmein, far in inventari da tut las purschidas per la giuventetgna ella Cadi, crear mieds d'informaziun aposta per nos affons e giuvenils, crear ni baghegiar ora plazs da sentupada ni da sport e giugs en nossas vischnauncas. Tut en tut sespruar d'udir e d'integrar meglier nos affons e giuvenils.

La cumiessiun ei sedecidida da seconcentrar en in'emprema fasa sin suandonts puncts:

- francar la lavur da giuventetgna sco punct fix el carnet da duers dallas personas responsablas en nossas vischnauncas
- inventarisar la purschida per affons e giuvenils ella Cadi cun crear in bien mied d'informaziun
- crear ensemen cullas scolas ina meisa canorta per sentupadas denter affons/giuvenils e gremis politics.

Promover il moviment

La geraua dil scolaesser, sport, cultura e sanadad da Mustér, Jris Lombris, constatescha ch'il moviment e l'activitad el liber ei d'impurtonza pils affons e giuvenils: «Pli baul setenevan ils affons e giuvenils si el liber duront lur temps liber. Oz constateschel jeu che quei ei per part buca pli aschia.» La vischnaunca da Mustér ha augmentau successivamein si'infrastructura per l'activitad el temps liber, era sil plaz scola a Cons. Giugs, ina piazza da ballapei ed urdeins stattan a disposiziun da tut temps als affons e giuvenils. «Quei pumprack ei staus in'ulteriura purschida che ha animau ils affons e giuvenils da semuentar el liber. Nus analisein las frequenzas, la finamira fuss segiramein da saver porscher in tal era igl avegnir», di Jris Lombris. Ina pusseviltad da plazzar in tal sepur-schessi eventualmein el Center Fontauna, damai ch'il plaz sigl areal da scola ei limitaus.

La geraua Jris Lombris selegra ch'igl ei reussiu d'organisar il pumprack dil cantun Grischun a Mustér.



Ei marscha zatgei ad Acla da Fontauna



Visualisaziun dil project dil niev hotel Acla da Fontauna.

La primavera 2023 vegn il baghetg vegl dil hotel Acla da Fontauna spazzaus e silsunter vegn entschiet ladinamein culla construcziun dils baghetgs novs: In niev hotel, habitaziuns administradas e secundaras.

Sil pli tard igl onn 2026 vul la cadeina da hotels Mövenpick che s'auda al concern Accor, arver il niev hotel Acla da Fontauna a Mustér. Il project numnaus «Mövenpick Living Disentis» ei calculaus cun investiziuns da rodund 100 milliuns francs. Baghegiaus vegn el dall'Immo Invest Partner SA. Ella ei la possessura digl areal cul hotel Acla da Fontauna ed eregia l'infrastructura nova cun hotel e habitaziuns. Silsunter surlai ella il menaschi dalla hotellaria a Mövenpick, ina da biaras cadeinas da hotel dalla gruppia Accor. Mövenpick vegn allura a menar il hotel e ha gia ella fasa dalla construcziun in plaid el capetel pertuccont formaziun da combras, habitaziuns e sectur da gastronomia. «Nus selegrein fetg da vegnir a Mustér ed en ina destinaziun ch'ei sesviluppada fetg bein ils davos onns», di Alusch Amoghli dall'Accor. La gruppia meina 5200 hotels sigl entir mund, porscha en tut 760'000 combras. Ella ei la tiarza gronda cadeina da hotels globala. Mövenpick ch'ei ina dallas marcas dall'Accor, meina en Svizra 77 hotels cun rodund 9000 letgs.

300'000 emploiai

Tut en tut occupa Accor varga 300'000 emploiai sigl entir mund. «Leu nua che nus essan representai luvrein nus cun glied indigena e nezegiein ils products locals e regiunals. Quei s'auda tier nossa filosofia, pertgei il hosp s'identifiescha culla glied che lavura el hotel e culs products ch'el sa consumar leu. Nus lein nezegiar il

know-how local», puntuescha Alusch Amoghli. Mo era ecologicamein fa Accor sforzs: «Entochen la fin da quest onn dat ei negin plastic pli en nos menaschis.» Accor Live Limitless – aschidadir in club – dumbra 70 milliuns commembras e commembers sigl entir mund. Els vegnan informai regularmein dalla porschida d'Accor: «65 milliuns nezegian activamein nossa porschida.» Accor fa vendita activa en 170 tiaras. Ils hotels da Mövenpick ha Accor surpriu avon biebein treis onns.

Novs hotels era ell'Italia

Alusch Amoghli ei perschuadius che Mustér vegn ad esser ina bun'adressa: «Mercure che s'auda medamein all'Accor baghegia treis hotels novs el nord dall'Italia. La fiera el sid ei interessanta e sa generar novs hosps per Mustér.» Avon che quei seigi aschilunsch cuoza ei denton aunc rodund quater onns. Quei temps vul la gruppia denton nezegiar per far las preparativas per ina buna partenza dil hotel niev a Mustér. Quel duei cuntener 197 combras, leutier 61 habitaziuns da vacanzas administradas. Plinavon eregia e venda la Immo Invest Partner SA 30 habitaziuns secundaras. Rodund 100 milliuns francs duein vegnir investai sin quei areal naven da primavera proxima. «Nus essan leds che nus savein far ussa la planisaziun en detagl ed entscheiver cullas lavurs primavera proxima. Nus essan empau ella situaziun d'in sportist che trenescha per sia concorrenza e sa lu ir finalmein alla partenza», puntuescha Fredy Ganz dall'Immo Invest Partner SA da Glattbrugg. Gronda peisa dat la gruppia era al Center Fontauna: «El ei per nus da grond'impurtonza, surtut era il glatsch artificial.»

Center Fontauna: La sanaziun e completaziun ha entschiet

Varga in onn e miez suenter che las votantas ed ils votants da Mustér han approbau il credit per la valorisaziun dil Center Fontauna (CF) han las lavurs da baghegiar persuerter entschiet. Duront ils proxims biebein dus onns ei il Center Fontauna in plazzal, mo tuttina stat la gronda part dalla porschida dil CF a disposiziun.

Per ina vischnaunca sco Mustér ei in investiziun da 10,6 milliuns francs ina summa immensa. Igl ei il pli grond project dalla vischnaunca ils proxims onns. «L'investiziun ei in signal per tut ils investurs che han investau ils davos onns biars daners ella regiun e che planiseschan aunc d'investar grondas summas» ha Clemens Berther, il president dalla cumissiun da baghegiar dil CF declarau l'entschatta matg cun occasiun digl act per l'entschatta ufficiala dallas lavurs. La vischnaunca stoppi far ils pensums da casa e mantener ed investar ell'atgna infrastruttura. «Ina vischnaunca periferica sto far dapli sforzs per esser attractiva per habitar, per esser in desiderau secund domicil, sco era per esser in liug popular da vacanzas. Per quei sto l'infrastructura constar e corrisponder al temps». La valorisaziun dil Center Fontauna seigi per quei fetg impurtonta.

Sfidas duront e suenter il baghegiar

Il Center Fontauna ch'exista gia dapi 40 onns daventa pli attractiv. Sper in niv local adattaus per sport da sanadad e fitness vegn era il spazi da reiver e bouldrar engrondius. Pils sportists daventan quels locals pli interessants e porschan dapli variaziun. La finamira ei da crear ina porschida per giuven e vegl. Sentupadas per sport e cultura, sco era da divertiment e recreaziun dueien haver plaz el Center Fontauna. La cumissiun da baghegiar ei perschuada che quell'investiziun augmenta l'attractivitat turistica dalla vischnaunca e regiun. Rodund 15'000 pernottaziuns generescha il Center Fontauna egl alloschi cun gruppas d'affons e giuvenils. Quei ein ils hosps da damaun per la regiun

turistica. Plinavon dat ei era discuers cull'armada d'activar igl alloschi per truppas il temps denter stagiun. In augment dallas entradas ei en vesta alla gronda investiziun indispensabels.

Il menaschi resta en funcziun

Tgi che ha gia inaga midau casa sa tgei che quei munta da pachetar e transportar tut enzanua auter. Il Center Fontauna mida casa e tuttina ei quei empau semeigliant. Per saver entscheiver cullas lavurs ha ei giu num svidar numerus locals e far plaz als mistergners. Mo auter che tiel midar casa sto tut igl inventari restar zanua el liug e savens sto quel era aunc esser disponibil per ch'il menaschi funcziun ton sco pusseivel senza impediments. Quei munta ina gronda sfida pil meinaproject Gioni Cavelti (Cavelti Derungs SA, Laax). El sto coordinar las lavurs ensemen cul menaschi e tuttina mirar da buca piarder temps e saver risguardar il plan da termins.

Pliras etappas

Las lavurs che han entschiet il matg cuozan entochen la stad 2024. Sco εμπrem vegn la part sut la halla da tennis baghegiada ora. Leu vegn construui in nova stanza da fitness sco era ina localitad per sport da sanadad, fitness da gruppa ni era per sesidas e seminaris. Sper quei dat ei el plaunterren novas gardarobas cun duschas ed indrezs sanitaris. En ina secunda etappa vegn l'entrada existenta transformada en ina caffetteria. Duront igl unviern 2023/24 vegnan silsuenter las lavurs internas exequidas. La tiarza etappa cumpeggia la nova part da bouldrar, la halla da reiver ed il plantschiu dalla halla da tennis. Sco davos vegn igl implont fotovoltaic montaus sil tetg e las fatschadas sco era il contuorn renovai. Sche tut va sco planisau vegn il Center Fontauna inauguraus cun ina gronda fiasta per la populaziun ils 24 d'uost 2024.

Informaziuns actualas ein d'anflar sin la pagina d'internet dil project <http://project.centerfontauna.ch>.

Il 2 matg 2022 ein las lavurs vegnidadas lantschadas. Pertuccai dalla sanaziun e completaziun dil Center Fontauna han inscenu quei tiern en ina moda e maniera speciala.



25 onns nossa Ludoteca



Adina sil niev stan (1)

La Ludoteca Disentis/Mustér e contuorn porscha ina vasta schelta da giugs da famiglia, giugs da rollas, termagls e dvd's alla populaziun da Mustér, allas vischnaucas vischinontas ed als hospes e quei per in prezi fetg favoreivel. La purschida vegn actualisada mintg'onn cun novs giugs sco il giug digl onn ed auters.

Colligiar las generaziuns senza barrieras (2)

Grazia agl ascensur da scala ei la ludoteca che sesanfla ella secunda alzada dalla halla Cons accessibla senza barrieras. Giugs da famiglia colligian las generaziuns entras experientschas comunablas e tuts san emprender ed exercitar novas cumpetenzas. Giugs fan tschaffen ed ins sa savens rir da cor.



Bamboleo (1)

Nossa finamira (3)

Il sortiment ei cumpatibels cul plan d'instrucziun 21. Giugar trenescha cumpetenzas cognitivas e cumpetenzas necessarias per la veta sco gudignar e spiarder, motorica fina e groppa, sviluppar strategias, collaborar ed aunc bia auter. Cun dar giugs 20 tochen 30 minutas mintga di contonsch'ins ina migliur dallas cumpetenzas tier tuttas vegliadetgnas.

Nus capin nossa purschida sco amplificaziun alla purschida dalla biblioteca e sco agid per las personas d'instrucziun. Las ludotecaras ed ils ludotecars dattan bugen cussegl, declaran il giugs e segidan cun la schelta.

Nossa lavur (4)

Nossa squadra sescolescha cuntinuadamein per saver far ina buna schelta ord tut ils tschiens novs giugs che cumparan mintg'onn silla fiera.

Silla nova homepage www.ludotecadisentis.ch sa mintgin prender investa dalla purschida. En ludoteca dein nus bugen risposta a tuttas damondas.



Puntreis (2)



Ina part dalla porschida dalla ludoteca. (4)



Tuor da cups colorai. (3)

Nus encurin tei

Dattas ti bugen giugs?
 Gaudas ti il contact cun affons e geniturs?
 En quei cass encurin nus tei per
 cumpletar nossa squadra.
 Neu sperasora e s'informescha.

Adressa:

Halla Cons, Via Cons 4,
 7180 Disentis/Mustér
www.ludotecadisentis.ch

Contact:

info@ludotecadisentis.ch
 076 494 39 92

Temps d'avertura:

gliendisdis / venderdis:
 18.30 – 20.00
 gievgia:
 16.00 – 17.30 (mo temps da scola)

Nies persunal

Quater damondas a Christoph Berger, scolast dil scalem superiur

Christoph Berger, Vus essas engaschai professiunalme in mintga di cun giuvenils. Tgei fascinescha Vus vid la funcziun sco scolast dil scalem superiur?

Igl ei fascinont da veser tgei svilup che quels giuvenils fan naven dil 7avel tochen il 9avel onn da scola. Tgei ch'ei fetg bi tier la scola da Mustér ei che la scoletta, la scola primara ed il scalem ault ein pli u meins el medem baghetg. Pli baul han ils affons encuretga la professiun per la veta. Il mument dat ei strusch pli constantas. Il process da sedecider per la via futura ei buca sempels. Ozildi ha ins denton bia pli bia pusseivladads da contonscher las finamiras persunalas.

Tgeininas ein las grondas sfidas en quella professiun en favur dalla formaziun da glied giuvna?

Nus savein sustener ils giuvenils e porscher ad els ina rama ed in bien clima d'emprender. Igl ei ina gronda sfida da motivar tuts tuttina bein duront la pubertad. Probabel ei quei engaschament era cuminaus ina ga ni l'autra cun fastedis ni forsa schizun disvaris. Co selaijan quels impedir ni la fin finala slijar? Sco giuven scolast hai jeu giu il sentiment ch'jeu stoppi aunc dar tips. Pli tard, cu jeu hai giu agens affons, hai jeu stuiu constatar che buca tut ei aschi sempel sco quei ch'jeu tertgavel. Tips dun jeu negins pli, ils geniturs fan schon tut il pusseivel. Cun mes scolars hai jeu denton bia pli bia pazienza che cun mes agens affons.

Dapi che Vus essas engaschai sco scolast a Mustér ha ei dau bein enqual midada el sistem d'instrucziun. Saveis numnar entginas?

Spel sistem da scola ch'jeu hai sez fatg atras el cantun Sutsilvania, hai jeu empriu d'enconuscher el cantun Basilea-Tiara il Model A nua che la reala e la secundara eran separadas cumpleinamein. A Binningen hai jeu lu fatg enconuschientscha dil Model B nua che la reala, la secundara ed il sutgimnasi eran ella medema casa da scola. A Mustér hai jeu instruiu ils emprems onns tenor il Model B. Dapi zacons onns instruin nus a Mustér tenor il Model C. La reala e la secundara vegnan instruidas ella medema casa da scola. Ils roms principals vegnan instrui en dus levels. Entras quei eisi pusseivel ch'in affon ch'ei fermes en lungatg e fleivels en quen, sa frequentar ils roms da lungatg el level ault ferton ch'el frequenta quen el level bass. Ils davos onns havein nus aunc giu l'introducziun dil niev plan d'instrucziun 21. Il pli impurtont ei buca il



Christoph Berger

Vegliadetgna: annada 1973.

Stadi civil: maridaus.

Professiun: scolast secundar, engaschus ella scola populara a Mustér dapi igl onn 2001.

Hobbis: retschercas historicas, viafier.

Lectura preferida: crimis ni comics da Casterman.

Spisa preferida: «Älplermagrone mit Öpfelmues»

Bubronda preferida: Gazosa.

Finamira persunala: star sauns.

sistem da scola, mobein ch'il contuorn seigi intacts e che tuts sustegnien in l'auter. Sco tier tut las professiuns eisi era impurtont ch'ins fetschi sia lavur cun plascher.

Tgeininas ein las sfidas futuras dall'instrucziun ella scola populara?

Il problem ei il svilup dalla societad. Nossa societad vegn adina pli pretensiusa e pli cumplacada. Quei sentin nus il pli fetg. Ins ha il sentiment ch'ei eri pli baul pli sempel. Forsa vegn quei sentiment denton era pervia dall'atgna vegliadetgna.

Uniun da costums Mustér

Schizun l'Uniun da costums Mustér ha ina historia che va pli lunsch anavos ch'igl onn da fundaziun. Nossa vischina Margreta Venzin, la quala saveva tschaffar mei da buob sco paucs cun sias historias e descripziuns, raquintava da fiastas e dietas da costums ch'ella ha visitau sco giuvna e dunna ensemen cun Fini Flury, l'anteriura ustiera dall'ustria Rhätia e madretscha dall'actuala bandiera dall'uniun. Margreta Venzin ei morta circa dus onns avon che l'actuala uniun da costums ei vegnida fundada ils 14 d'ost 1979. Ed ussa suenter varga 40 onns ei il futur dall'uniun da costums daventaus incerts. Quei futur denton, ei in spiegel dil moviment dallas uniuns da costums el Grischnun naven da Martina ell'Engiadina Bassa entochen sil Pass dall'Alpsu. La schientscha per quella cultura para dad ir a smerscha. Quei svilup fa empau sterment, denton para el dad esser inevitabels ed esser cumbinaus stretgamen cul svilup individual da nossa societad e che vul per amur da certas cumadeivladads e digl individualissem personal desister d'activitads d'uniuns cumbinadas cun bia temps liber ed in'ü l'autra obligaziun. Denton ei ha aunc buca tucchau da miert e forsa po ei dar ina midada el trend negativ.

Sche nus savein buca frenar il svilup actual vegn l'Uniun da costums Mustér en paucs onns ad esser historia. Ermelinda Casanova e Giuseppa Hosang havevan organisau per la primavera 1979 in cuors da saltar e l'emprema producziun ha gia giu liug a caschun dalla



L'Uniun da costums Mustér cun occasiun dil giubileum da 30 onns igl onn 2009.

Uniun da costums Mustér

Onn da fundaziun 1979.

Diember da commembras e commembers: diesch activs, sis commembras d'honor buca activas ed entgins commembers passivs.

Suprastonza actuala

President: Ervin Maissen, actuara: Helene Maissen-Fay, cassier e vicepresidente: Marcus Jacomet, mussadra: Heike Levy, vicemussadra: Irene Huonder, revisurs da quen: Ignaz Deflorin-Spescha (dapi 43 onns e dapi in tschuat onns era bandierel) e Rita Genelin.

fiasta naziunala digl 1. uost 1979. L'uniun da giuventetgna tetgala dalla vischnaunca che disponeva lu d'in tschuat costums per la giuvnas che purtavan Nossadunna haveva saviu segidar culs costums per las dunnas. 15 dunnas e 12 umens ein s'entupai la sera dils 14 d'ost 1979 el hotel Sax per fundar l'Uniun da costums Mustér. Ermelinda Casanova ha tgirau duront onns ina gruppa d'affons cun fetg bien success. Oz dat ei egl entir cantun neginas gruppas d'affons, gnanc ella biala Portenza.

El decuors dils onns ei l'uniun sesviluppada, commembras novas e commembers novs ein denton vegni scarts. Oz dumbra l'uniun aunc siat dunnas e treis umens sco commembers activs. Dils fundaturs fan aunc quater personas activamein part dall'uniun ed entginas personas prendan part sco commembras d'honor allas activitads localas dall'uniun. Pli che la mesadad dils commembers actuals ha contonschiu il temps da pensiun. L'uniun ha festivau plirs giubileums ed ei separticipada a numerusas fiastas sin plaun cantunal, naziunal ed internaziunal. Nus havein astgau passentar biaras bialas uras da cumpignia e prestau entgins kilometers en fuorma da schotischs e valsers. L'uniun da costums ei segidada cun organisar ed embellir differentas fiastas en vischnaunca. Semida la situaziun denton buca eis ei da quintar che quei agid che sefa da «sesez» vegn a muncar. Enzatgi vegn a sorprender l'incarica da purtar Nossadunna allas processions ni ch'ella resta en paucs onns en baselgia enstagl sin via accumpignond ils pelegrins sin viadi. Dunnas ed umens, giuvnas e giuvens han caschun da segidar da midar quei svilup negativ cun separticipar activamein alla veta culturala da nossas uniuns en vischnaunca. L'uniun da costums ei buca la suletta che ha da sbatter.

Avon 333 onns: La Bova gronda

Il 29 da zercladur 1689 – il di da s. Pieder e s. Paul – ei bein il di cul pli grond eveniment natural sin intschess dalla vischnaunca da Mustér. Quei di ei numnadamein la Bova gronda sederschida a val e ha satrau ils vischinadis Valentin e Brulf. 22 personas ein mortas, leutier ein casas e baghetgs d'conomia e la baselgia vegni satrai d'ina dimensiun nundetga da crappa. «Mustér ha fatg atras ina tragedia d'ina mesira apocaliptica», scriva inschignier forestal Alexi Sialm el cudisch «Temps vargai – temps present» da Mustér. Denter 30 e 40 habitonts dils dus vitgs han surviviud damai ch'els eran a messa gronda a S. Gions. Els han piars tut: confamiliars, animals, baghetgs, luvratoris e terren agricol. Sco quei ch'ins sa leger el cudischet «Ils nums locals da Mustér» da pader Ambros Widmer permier, cumpariu 1986, ein entginas personas setratgas a Caprau e Cavardiras, ils auters ein secasai el vitg da Mustér. Medemamein constatescha pader Ambros: «Ins astga supponer che la venerabla claustra hagi regalau als survivents da Brulf suloms e regress en sia stretga vischinonza.» Sco quei



Il territori dalla Bova gronda oz.

che pader Ambros citescha Francestg Bundi permier da Disla, derivavi quasi la mesadad dallas famiglias dil vitg da Mustér da Brulf: ils Beers, Lutzs, Scherrers, Smeds, Frys ed auters; probabel eri quei Valeisers emigrai all'entschatta dil 14avel tschentaner sul Cuolm Ursera e sereparti empau dapertut pils uclauns e las uclivas entuorn. Suenten 1689 seigi il vitg da Mustér carschius ad in crescher.

Avon 50 onns: Las pendicularas vegnan en funcziun

Ina punt sco simbol per la buna collaboraziun



Il president communal René Epp (dretg) ha surdau al president dil cussegl d'administraziun dallas Pendicularas Mustér SA, Marcus Weber, ina punt sco simbol per la buna collaboraziun. Ella duei far punts, colligiar, surmuntar e reunir.

Cun ina fiasta populara el Catrina Resort han las Pendicularas Mustér SA commemorau ils 25 da matg 2022 il giubileum da 50 onns. Il president dil cussegl d'administraziun, Marcus Weber, ha sutlingiau la tenuta visunara dils fundatur ed il president communal René Epp ha appellau alla solidaritad e la collaboraziun.

Igl onn 1969 ein las Pendicularas Mustér SA vegnidas fundadas culla finamira da sviluppar turisticamein la region. Iniziant dad ellas ei Pius Condrau staus. Ad el eis ei la fin finala era reussiu da carmalar la Societad da participaziun Arenberg GmbH da Düsseldorf a Mustér che vegneva menada lu da Heinz Capelle. Per vigelgia da Nadal igl onn 1971 ein ils emprems indrezs da transport vegni en funcziun. Successivamein ein ulteriurs suandai. La societad d'Arenberg ei stada capoacziunara entochen igl onn 2015. Lu ha ella vendiu siu pachet d'aczias ad ina societad cun Marcus Weber alla testa. Lez ha buca mo procurau per novs indrezs el territori da skis, denter auter d'ennevar e la pendiculara nova a Sedrun, mobein ha era erigiu il Catrina Resort. Tut en tut ein rodund 130 milliuns francs vegni investai ils davos onns, ulteriuras investiziuns vegnan fatgas il mument ni ein sin rucca.

Ton Marcus Weber sco René Epp ha accentuau alla fiasta da giubileum la buna collaboraziun. Mo comunablamein seigi ei pusseivel da haver success e da surmuntar las sfidas digl avegnir. Sco regal pil giubileum da 50 onns ha la vischnaunca da Mustér surdau allas Pendicularas Mustér SA ina punt sco simbol per la buna collaboraziun sco era 50'000 francs pil project dalla punt sur il Rein d'Acletta sur la staziun da val. 50'000 francs – aschiadadir ina da melli per mintga singul onn d'existenza dallas pendicularas.

Annunzia e recommendaziun.

Il suttascrèt recamonda a tuts enonuschents da luntsch e datier, ultra de sia casa de pensinn ed ustria

„Alpsu“
era siu niev

Restaurant senz' alcohol

a Mustér.

El vegn en quel surviu da tutas uras tutas glavischeivlas bubrondas senz' alcohol, sco caffè, tee, latg, schocolada, vin senz' alcohol etc.

En medem temps offerescha il suttascrèt per prezis moderai ses buns vins de melsa, prima vin de Valtellina e vins alvs.

Engraziand a sia stim. clientella per la confidonza demussada entochen da cheu, segna cun perfetga stema

Jos. Schwarz.

1 2

Avis per Mustér.

Sin glavisch de commembers procurescha l'Uniu purila de Mustér per qualificai

sems de fein e treifegl e sem de truffels.

Annunzias san vegnir dadas en entelfer 10 dis alla

Suprastonza dell' Uniu purila, Mustér.

Tachercou de prender si 1/2 dretg de piertg en l'alp Russein-Mustér.

Alois Huonder-Mustér.

Societat milit. de tir Mustér

Domengia prox., ils 14 d. q., immediat eunter viaspras en casa de scola a „Cons“.

Scadin commember el supplieaus de comparer. Il comité.

Negozi de tiers.

Sin la fiera de Mustér dils 8 d. q. ei stau catschau ca. 20 tocs biestga. Cartend ch' il negozi vegni ad esser fetg calms, ein ils purs buca compari sin fiera cun lur mercanzias. Il di de fiera ein denton entgens marcadonts talians vegni, ils quals hav prest giu cumprau si ils tiers catschai sin fiera. Ils prezis varian denter 700—1200. Ins spera, che entras igl export ell' Italia vegni il negozi de tiers en quort a survegnir meglier esit ed ils prezis a seelzar.

M.

Annunzia e recommendaziun.

Il suttascrèt fa cheutras enonuschent, ch' ei hagi en provision

material de baghiar sco: cement, caltschina, giep, begia de cement e de tiaracotga e zinghels. Tut per raschunelvel prezis.

Tut quei material ei de haver cheu a Mustér tier il suttascrèt ed a Trun tier Giuana Tomaschett. — Pllnavon san ins aunc haver in quantum bien stuors veder de tetg.

Zazzi Giuseppe, Mustér.

Plattas de fiug,
modell grischun cun cundrez patentau.

Quella plattas han in extra ault fuorn per far paun e bugliota d'iron, tut fetg adattau per ora silla tiara.

Cundrez per trer il vapur ord cuschina;
Cundrez patentau de pegnas fetg comprovau.

Tut il sura ei installau tier sgr. fravi Brenn a Glion. Pia avon che cumprar plattas de fabricas, mirei tala installaziun in di de marcau tier sgr. Brenn.

Per sura lavurs serecammondan cun garanzia

Ernst Huonder e fegls, Mustér.

NE. Attestate stattan en disposiziun.

3 1

Avis per Mustér.

Tuts luvers, vischins de Mustér, che han negina ne nussufficienta lavur e reflecteschan sin lavur vid la via d' ual a „Ranfoppa-sura“, san sannunziar en scret entochen ils 10 d. q. tier gerau Carli Manetsch a Funs.

La suprastonza.

Venal a Disla ina casa

cun plaz per ina pli gronda famiglia, cun clavau, nuegl e regrese.

De sadressar tier

Ferdinand Casaulta, Disla.

Avis per Mustér. Domengia, ils 9 d. q., sunter viaspras, vegn el local de scola en casa pauperla pagau ora quene dila scolaresser.

Il cassier de scola.

Avis per Mustér.

Venal in misa sills Berschaus sur Segnas. De sadressar tier

Pl. Bundi, Mustér.

Avis per Mustér.

Il setener si ord in motiv ne l'auter en il territori giu sut, nus ch'ei vegn baghiu la nova via d' usul Vall-praue-Pegorodun, ei ord motiv de prighel tras crappa ne lenna scommandau.

La suprastonza.

Per spusai!

Bialas veras ed anials d'aur

adina en provision recamonda 2 2

Jos. Giger, urè, Mustér.



„Il Samaritan“

In clar e practic entruidament sanitaric romontsch da Dr. G. Federspiel, mied a Domat. Cun numerusas illustraziuns.

Ei d' haver pli prez de 2 fr. dalla

Stampa romontscha, Mustér, dagl autur ed a:

Mustér, Placi Bundi, papeteris, Bas. Giger e G. Andrioli-Monn.
Curaglia, Stiafen Bundi.
Sedrun, familia Berther, Cruna.
Sumvitg, Fid. Lechmann, Placi Monn e Societat acziunara.
Rabius, Leci Baselgia.
Trun, Felici Job, Societat de consum e fillalas, Paul Tomaschet.
Tavannes, dunna Maria Spescha.
Rueun, consum agric.
Cumbel, marcadont Th. Elvedi.
Vrin, Gion Bat. Solèr.
Vella, Derungs, negozi.

Lumbrein, Casaulta, negozi.
Fiem, negoziant Chr. Meiler.
Glion, Moriz Maggi, artavels.
Frz. Derungs, artavels.
Razen, Uniu de consum.
Cuera, libreria Heinrich Keller e libreria Schuler.
Casti, Vieua Maria Sigron-Poltera.
Savognin, Vasescha & Platz.
Riom, vieua Verena Cärisch.
Roffna, negoz. Joh. Durband.
Vazau, Gaudenz Bergamin.
Sur, Th. Jäger
Tinezun, Jac. Gianiel-Spinas, artav

Lavur en concurrenza.

La vischnaunca de Mustér arva libra concurrenza sur la erecziun della via d' usul:

„Val praue“ — „Pégn rodun“ = 980 m. corrent e sur il pinar e luvrar si la lenna che croda en via.

La via vegn event surdada en duas sezziuns. Dals plans e condiziuns sa vegnir priu invista tier igl uffeci forestal communal a Mustér.

La vista oculara dalla lavur ha lug ils 9 d. q., allas 9 uras sil plaz a „Val praue“ e las offeras ein de dar en agl uffeci forestal com a Mustér entochen ils 11 d. q., dal qual ils formulars d' offerta san vegnir retratgs.

Calender d'occurrenz

Sonda, ils 13 d'uost 2022

Fiesta dil vitg da Mustér

Dumengia, ils 21 d'uost 2022

Allas 11.00 concert classic ella baselgia da s. Gada.

Venderdis–dumengia, 26–28 d'uost 2022

Fiesta da bulius

Dumengia, ils 9 d'october 2022

Marchiband Jugendcamp

Naschientschas e mortoris

dil mars 2022 entochen matg 2022

NASCHIENTSCHAS

Alexandr Dodatok, naschius igl 1. da mars 2022, fegl da Valentina e Denys Dadatok (Ucraina)

Jan Flurin Lindenberg, naschius ils 9 da mars 2022, fegl da Julia Lindenberg e Christian Gisler

Maurin Bigliel, naschius ils 12 d'avrel 2022, fegl da Seraina ed Adrian Bigliel

Anna Mattea Candinas, naschida ils 13 d'avrel 2022, feglia da Barbara e Silvio Candinas

MORTORIS

Leci Simonet-Flepp, naschius ils 25 d'october 1922, morts ils 9 da mars 2022

Mengia Steger-Columberg, naschida ils 5 da zercladur 1921, morta ils 15 da mars 2022

Rosa Duff-Capaul, naschida ils 10 d'uost 1935, morta ils 17 da mars 2022

Clotilda Tenner, naschida ils 12 da schaner 1929, morta ils 20 da mars 2022

Marius Valentin Huonder, naschius ils 27 da zercladur 1958, morts ils 27 d'avrel 2022 (extern)*

Leci Augustin Giger, naschius ils 29 da november 1937, morts ils 6 da matg 2022 (extern)*

Alexi Flepp-Hollenstein, naschius ils 30 da fenadur 1933, morts ils 11 da matg 2022

Christina Bischof-Häfeli, naschida ils 20 da fevrer 1956, morta ils 11 da matg 2022

* Buca domiciliaus denton satraus a Mustér

Nos giubilar

Il mars, avrel e matg 2022 ha la vischnaunca saviu gratular a plirs giubilar sin natalezi rodunds en aulta vegliadetgna.

Josefina Levy-Thomann,

ils 26 d'avrel 2022,
95 onns



Rudolfin Lechmann-Senn, ils 4 da matg 2022, 95 onns



Fritz Bach-Sacchi, ils 7 da mars 2022, 90 onns



Imelda Bigliel-Flepp,

ils 8 da matg 2022,
90 onns

Administraziun communal

Via Cons 2
Caum postal 57
7180 Disentis/Mustér

T 081 920 36 36
admin@disentis.ch
www.disentis.ch